

10 SEP 2002

Mahathir-Majikan/I

TIADA TINDAKAN TERHADAP MAJIKAN, KATA DR MAHATHIR

BANGI, 10 Sept (Bernama) -- Perdana Menteri Datuk Seri Dr Mahathir Mohamad berkata hari ini kerajaan tidak berhasrat untuk mengenakan tindakan terhadap majikan Malaysia yang pernah mengambil pekerja asing secara haram memandangkan pendatang itu sudah pulang ke negara asal masing-masing.

"Kita tidak mengambil tindakan terhadap mereka dahulu ketika mereka (pekerja asing secara haram) itu masih berada di sini, jadi kita tidaklah boleh mengambil tindakan sekarang... mereka sudah pulang," kata beliau.

Sekarang kerajaan mahu memastikan supaya industri pembinaan berjalan dengan lancar, dan pekerja asing yang mahu bekerja di negara ini hendaklah datang melalui cara yang sah pada sisi undang-undang, katanya kepada pemberita selepas membuka Institut Malaysia-Perancis di sini.

Ketika ditanya sama ada majikan Malaysia telah mengenakan ugutan terhadap kerajaan dengan memaksanya mengubah semula keputusannya mengenai pengambilan buruh asing, Dr Mahathir berkata: "Bukan untuk mengubah semula, jika mereka (majikan) mahu mengambil (buruh asing), mereka mestilah mengambil hanya mereka yang datang secara sah sahaja, jadi mereka perlulah membayar."

"(Jika kita) mengenakan tindakan terhadap mereka (majikan), kita bertindak terhadap diri kita sendiri... industri pembinaan tidak akan bergerak," katanya.

Malaysia telah menetapkan tarikh 31 Julai lepas sebagai tarikh akhir untuk pendatang tanpa izin meninggalkan negara ini atau menghadapi hukuman rotan dan penjara jika gagal berbuat demikian.

Peluang pengampunan yang diberikan oleh kerajaan itu telah diambil oleh sebilangan besar pendatang tanpa izin yang bekerja di negara ini.

-- BERNAMA

SR AHH RM NMO